

El provedador de l'armata è qui alozato in casa mia. Stato a Liesna, ha punito quelli scelerati, opera molto bona, e sta per andar in l'Arzipielago, havendo biscotto perchè de qui n'è pochissimo. Ha fato apicar a Liesna 20 et taiato man et ochii a 12, e molti bandizati. Nui de qui habiamo retenuto uno de quelli scelerati; el proveditor lo farà apichar, et sarà esemplo a tutti, etc.

- 181 *Sumario di lettere di Aleppo di sier Hironimo Dandolo di sier Antonio, date a dì 7 Octubrio 1514, drizate a sier Zuan Paulo Gradeno luogotenente di Cypro, et per lui mandate di qui, per lettere di 4 Novembrio ricevute a dì 3 Dezembrio.*

Ancor che sia certissimo quella averà inteso per la via de la Turchia, zerca ai campi dil Turco con quello dil Sophi, dove fin qui non habiamo auto nova niuna che i siano stati a le man; ma per quello si dize di qui, per Mori, che loro è stati a le man a dì 30 del pasato, perchè in quel zorno di qui fu una gran combustion di tempo e di polvere e di rozesa di ajere, tal che tutti dicono loro esser stati a le man quel zorno; ma per esser zorni 20 de camin de qui dove i sono ancora, non se ha potuto haver la nuova, e poi in quella sera medema fu visto, e mi viti, una cometa levarsi di ajere da la volta di Turchia, e andò cussi caminando per ajere verso el paese del Suffi per mexi tre di longo, dove niun pol pensar altramente salvo el Turco li è sta roto, che missier Domine Dio habbia lassato far quello sia per el meglio. Da poi, se dize che di zorno in zorno el dia venir qui el campo dal Chaiero, manda el Soldan, perchè else dubita di queste terre per el Turco; sichè spiero di brieve trovarmi de lì in Cypro, vegnendo ditto campo, perchè saremo forte mal tratadi sì de la vita come di la roba, e *maxime* di quelli schiavi chajerini che sono come bestie. Dove, si vien dato campo, darò la roba a persone de Mori che sono fidatissimi, come ho fato quando veni l'altra volta, perchè non voio star a description di bestie; e credo anche damaschini se ne vegnirano, perchè anche li el manderà campo, e non farò come fici l'altra volta; et vado cussi aconzando tutte le mie cosse, e subito intendi el vegni, subito monterò a cavallo e verò a trovar vostra magnificentia, perchè mi tegno che se el Turco vien roto, come se dize, el vol esser di qui grandissime guere, che priego missier Domine Dio i tajano tutti a pezi, et non habiamo più briga de cridar con sta canaia. Si chè spiero di brie-

ve vegnir a trovar quella. Da novo di qui nulla altro habiamo, etc.

- Sumario di una altra lettera di sier Mafio di Prioli di sier Michiel, da Damascho, di 7 Octubrio, drizata al dito luogotenente di Cypro.* 181*

Perchè son certo che a la vostra magnificentia li sarà de piazer de intender queste nove de qui, non resterò de far el debito mio in avisar quella. E dico che per avanti, zà fa 8 zorni, zonse el campo del signor Soldan con 5000 schiavi, tutti homini da fati; et l'altro zorno, a dì 3 dil instante, zonse li soi capitani con forsi altri 2000 schiavi, li quali vanno a li confin di Aleppo, non per esser contra al Sophi nè contra al Turco, ma per bon rispetto, perchè ogni uno di loro che guadagnase se ne veneriano seguendo la victoria fino al Chaiero, perchè tutti questi popoli, *una voce*, più presto voriano christiani, o sia chi se voia, che star in mano de questi schiavi, che di continuo li scortegano. Et sapiando el Soldan che questo facilmente dovria intraver, per obviar a questo infortunio ha mandato questi schiavi a quelli confini. Zerca a la guerra del Turco con el Suffi, intendemo certo che sono stati a le mano; ma cui sia stato vinzitore non lo intendemo certo, che molti dizenò che el Suffi a jostrato lanza con lanza con el Turco e che sia stà passato el Suphì da una banda a l'altra, et è morto molti. Altri dizenò che sono stati a le mano, et che quelli del Suffi à morto de quelli del Turco da 40 mila persone et di le sue 12 mila, atento che lui è stato vinzitore, e questo me intra più in testa, perchè tutti, overo la più parte de li janizari che xè con il Turco, sono suffiani per la vita; *tamen*, spero che di brieve avremo el certo, et ne darò aviso a la magnificentia vostra. De mercantia de spezie, tra nui franchi, semo in tanta division, che se non se acordemo, faremo tutti le male fin, et senza causa nisuna, perchè el ne sono specie per do volte tanto quanto xè le merze et che havemo et che vegnirano, e se mai fo el tempo a far qualche ben, el xe questo, da poi li tanti mali anni come habiamo hauto. *Tamen* semo tutti de tanta mala natura, che più presto sofrimo a cavar se tuti do li ochi a nui per cavarne uno a lo compagno. Ancora non è stato roto mercado de niente; sichè fazandose, ne darò *etiam* aviso a quella, etc.